

C. T. LOO & CO.  
41 EAST 57th STREET  
NEW YORK, N. Y.

NO. 552

HGT. 4 Vols.

LENG. \_\_\_\_\_








過雲樓書  
畫記  
十卷

每部龍  
銀叁圓



Digitized by the Internet Archive  
in 2016



過

雲

樓

書


畫

記

十

卷







過雲樓書畫記自敘

書畫之於人子瞻氏目爲煙雲過眼者也余旣躋其論以名藏祕之樓則羅而儲焉記而存焉適然之遇已耳殆無容心雖然入之非深六典七略直視無睹奚足異苟浸至於是嵇鍛阮屐且若與生俱來矧其爲書畫書畫惡乎宜宜娛老古之人非深得昧氏重爲輕根靜爲躁君之指不能翰畢名世重故神常內凝靜故物不外崇故其人眉壽又宜初學孔子云君子不重學不固諸葛君云非靜無以成學瑩慮識陶質性莫疾於書畫故夙慧之子好焉余家舊尠藏弃先子暮年獲名賢一紙



恆數日驩余務以娛其心先子務以牖余學題躔躔標  
遂不脛而至及次子廷熙三子承長余之教熙承熙承  
之事余一如誰昔則以是爲韋氏籙經仲氏菽水亦旣  
三世矣先子於眞僞工拙審之又審按款識歲月覈諸  
行事以究所繇作左卷軸右故書雅記恆不離或進余  
隅坐假以辭色俾獻一得余於二子亦然而二子頗不  
鈍熙能畫尤長於書惜年不副志承少時業從余友徐  
江帆程序伯游甫成人何子貞吳退樓亟稱其書畫余  
學焉而無所成爲負先子幸其能彌余憾焉是記命意  
竊本先子而與承論定者居多曾謂區區簞述不及過



庭之時而是子復不終相乎余得斯樂於先子二子得  
斯樂於余將使嗣二子而興者復於二子得斯樂庶無  
拂乎余心今此過雲樓之藏前有以娛吾親後有以益  
吾世世子孫之學亦復奚恨乃吾欲娛老造物似不允  
何也濡筆泣然壬午秋日元和顧文彬時年七十有二







凡例

一米元章論畫云絹八百年而神去顧世傳唐宋名跡  
縑素居多求其確然可証者百難一二遇故敝篋所收  
但錄紙本

一自來箸錄家相傳名跡而實係僞託者如蘇文忠乞  
居常州奏狀米元章崇國公墓志之類旣諫雁本概不  
入錄

一有合裝卷而眞僞各半若唐寫三彌底部論前之龍  
眠十六應眞圖元人集冊首之松雪翁回仙觀贊不有  
去取甯云鑒別茲錄悉爲剖抉勿令白沙在泥與之俱



黑

一凡遇宣和舊裝必詳著行款式樣援齊東野語存紹興御府書畫式輟耕錄記書畫標軸例也此外雖鏤牙紫羅精妙絕倫亦以限於篇幅略之

一自江村銷夏錄後於前代公私璽印悉載無遺甚至胡盧連珠鈎摹滿紙余終嫌其骨董家數且賞鑒之道不盡在是何必合上下千百年作集古印格哉

一書畫中遇詩文亦必盡情收錄此朱性甫鐵網珊瑚成例也余謂天壤間名跡祇有此數流傳至今箸錄已得大判復有稱述不過如東坡所謂者餅水傾入那餅



水而已必欲以七十老翁爲古人小胥非惟無謂抑且多事

一題跋諸家名氏爵里不憚攷訂者都元敬鐵網珊瑚王元美弇州四部稿是已吾鄉碩賢表彰遺獻數百年後猶見盛心偶有聞知亦援斯例惟昌黎茫視師丹耄忘罅漏滋多內省孔疚海內方聞幸匡不逮

一是錄書畫分類其有合璧者則以畫爲重概入畫類故如江南春深翠軒二圖皆衡山爲元賢補圖而斷代成史前輩轉爲後賢屈

一式古堂書畫彙考懷烟閣吳越所見書畫錄凡所記



載間有疏舛如黃文節梵志詩卷未檢脫字俞紫芝春  
秋詩禮冊不符番數非有他故也或假自朋儕觀從估  
客猝難細覈耳是錄非寒家收藏經愚父子審定者槩  
不入錄庶免此失

一敝篋中黃大癡手書畫理冊祝枝山正德興甯縣志  
手稿冊銘心絕品亦斷種祕本也故 欽定四庫全書  
提要俱未收入茲錄悉放擘經室集四庫未收書目例  
詳爲考核冀後世志經籍者采擇焉

一卷冊詳注紙素兼疏尺寸體例所在余初以定武蘭  
亭尺記其脩廣而昏眊善忘轉致挂漏徐思 本朝如



退谷可謂真鑒矣然所爲銷夏記無及此者故荷屋纂述亦以刻舟求劒爲非是錄取則庚子辛丑兩家敬告當世論雅道而斤斤於斯其爲正法眼藏也幾希

一易安墨竹淑真畫菊並見紀載屬在閨幃易於名世故下至馬守貞辭素素亦分片席然安知無飾粉黛於壯士蒙衣袂於婦人者過而存之甯不爲翠袖紅裙匿笑地下

一各家著錄兼及古刻敝藏九成宮醴泉銘雲霞蔽虧四字未泐者當是唐搨及宋搨五字不損本定武蘭亭之類不下百十種究以檀椎所爲下於真蹟一等他時



當放金薤琳琅石墨鐫華別錄成書縣牛頭賣馬脯幸  
無譏焉

一宋克絲元繡入畫類此珊瑚網舊例也 欽定佩文  
齋書畫譜仍之是錄絹本既不入選則雖墨絲樓閣精  
於界畫如修內司法式分杪不得踰越者亦復槩從割  
愛無取兼收

一著錄單條與扇始於郁逢慶書畫題跋記然單條尙  
有吳仲圭曹雲西諸家扇則僅陳白陽而已亦以其瑣  
碎也茲錄但收卷冊挂幅如寶繪堂之例若欲與爾雅  
樓扇卷甲乙並傳則我不暇



一書畫乃昔賢精神所寄凡有十四忌  
度藏家亟應知之  
霾天一穢地二鐙下三酒邊四映摹五彊借六拙工  
印七凡手題八徇名遺實九重畫輕書十改裝因失舊  
觀十一耽異誤珍贗品十二習慣鑽營之市僧十三妄  
摘瑕病之惡賓十四舊榻諸過雲樓楣今綴例末爲宇  
內同志箴



月  
例

四



過雲樓書畫記目錄

元和顧氏

書類

卷之一

釋智永真草千文卷

米題褚摹蘭亭卷

米題唐模蘭亭卷

唐寫鬱單越經卷

唐寫續花嚴經疏卷

唐寫三彌底部論卷

范文正手札卷



蘇文忠祭黃幾道文卷

蘇文忠與謝民師札卷

黃文節梵志詩卷

朱文公周易繫辭本義手稿卷

朱晦翁上時宰二手札

魏文靖文向帖卷

張溫夫楷書金剛般若波羅蜜經冊

張溫夫楷書華嚴經冊

卷之二

趙文敏小楷黃庭經卷



趙松雪酒德頌卷

趙文敏草書千文卷

趙松雪秋興賦卷

趙仲穆行書洛神賦冊

一峰道人手書畫理冊

虞文靖楷書劉垓神道碑銘卷

元五家贈筆工范君用冊

元賢手迹集冊

草窗年譜附

卷之三

楊鐵崖海棠城詩卷

楊鐵崖芝庭處士虞君墓碣銘冊

雪菴和尚書昌黎山石詩卷

俞紫芝臨定武稷帖并詩卷

俞紫芝小楷春秋左氏穀梁傳詩柏舟小序禮檀弓記冊

楊彥明五體千文冊

元人靜學齋詩冊

李忠文詩卷

五大僧字卷

釋師訓白書詩卷



宋仲溫書陶詩卷

卷之四

靖難三忠遺墨卷

吳文定自書種竹詩卷

嚴介溪贈王子儀詩序冊

祝枝山楷書擬詩外傳卷

祝枝山九愍詩卷

祝枝山行楷書正德興甯縣志冊

祝枝山懷知詩卷

唐子畏漫興詩軸

文待詔曹君墓誌銘卷

文待詔落花詩卷

又落花詩卷

雅宜山人游包山詩卷

錢叔寶手寫唐朝名畫錄

董文敏臨黃庭經小楷卷

董文敏臨樂毅論冊

董香光臨東坡叔黨父子帖冊

熊襄愍東園十詠卷

范文忠行書卷



倪文貞十七帖卷

路文貞手書張承業傳卷

黃忠端唐公墓志銘卷

盧忠烈十驥詠卷

東林五君子書札冊

五

七



過雲樓書畫記目錄

元和顧氏

畫類

卷之一

吳道元水墨維摩像軸

釋巨然海野圖卷

李龍眠醉休圖卷

米元暉瀟湘奇觀卷

夏禹玉煙江疊嶂圖卷

劉暗門蓬萊仙居圖卷

揚補之四清圖卷

南宋畫院本上林圖卷

錢玉潭山居圖卷

趙子固淩波圖卷

卷之二

趙文敏墨竹軸

黃一峰浮嵐暖翠軸

王叔明怡親堂圖卷

黃鶴山樵稚川移居圖軸

黃鶴山樵竹石游靈巖詩軸

黃鶴山樵停琴綠陰軸



黃鶴山樵松山書屋軸

黃鶴山樵贈古愚徵君山水軸

倪雲林贈袁寓齋卷

倪幻霞贈顧仲瑛春柯筠石圖軸

倪幻霞琪樹秋風軸

倪幻霞春宵聽雨軸

吳仲圭水墨竹石軸

吳仲圭谿山高隱圖軸

王振鵬元宮圖卷

張叔厚九歌圖卷

華唐卿玄門十子圖卷

張子正脊令圖卷

張子正桃花春鳥軸

陸天游谿山圖軸

王若水墨寫梅花水仙卷

柴適齋仿古山水冊

元人閑止齋圖卷

元賢竹林七友卷

卷之三

王孟端山水卷



王孟端爲張文寶作筆舫圖卷

顧雲屋丹山紀行圖卷

謝葵邱爲盛啟東雲陽早行圖軸

杜東原南村別墅十景冊

陳宗淵洪崖山房圖卷

劉完菴山水軸

包汝調都隱圖卷

楊忠愍仿顧長康山水軸

周東村俞節婦刺目圖卷

周東村聽秋圖卷

陶雲湖叢篁水鳥卷

文康公歲寒三友圖卷

周官觀燈倡詠卷

郭清狂八葉冊

史癡翁三絕冊

卷之四

沈石田縹緲峰圖卷

沈石田臨黃子久深山曲隴圖卷

沈石田東原圖卷

東原先生年譜附

沈石田虎邱圖卷



沈石田墨花卷

沈石田三蘇生傳圖卷

石田江雲谿月圖卷

石田翁仿梅道人山水卷

石田送行圖卷

沈石田思萱圖卷

沈石田大冊

沈石田加餐圖軸

沈石田山樓餞暑圖軸

沈石田杏花軸

唐子畏王濟之出山圖卷

唐六如貞壽堂圖卷

唐子畏黃茅小景圖卷

唐子畏風木圖卷

六如居士溪橋杖履圖軸

唐解元正覺禪院牡丹圖軸

唐六如觀杏圖軸

唐子畏匡廬觀瀑圖軸

唐六如萱花圖軸

文待詔蘭竹卷



文衡山溪堂讌別圖卷

文衡山芝庭圖卷

文衡山天台圖卷

文衡山花游圖卷

文衡山惠山茶會圖卷

文待詔風雨重陽詩畫卷

文衡山補圖雲林江南春卷

衡山補圖元賢深翠軒詩文卷

文衡山寫生十幅冊

文待詔山水冊

文衡山松陰高士圖軸

文衡山落木寒泉圖軸

文待詔松泉高逸圖軸

文衡山五月江深圖軸

文待詔仿趙魏公湘君湘夫人圖軸

張夢晉竹林七賢圖卷

張夢晉漁舟圖軸

仇十洲唐六如刺目雙圖卷

仇十洲江南春卷

仇十洲臨貫休白描十六羅漢卷



仇十洲摹冷起敬蓬萊仙奕圖卷

仇十洲瑤臺清舞圖卷

卷之五

文五峯芳園十五景圖卷

王吏部白描水仙卷

王吏部水墨欣賞冊

文彥可米菴圖卷

錢叔寶求志園圖卷

陸五湖溪山圖軸

陸包山綠牡丹圖軸

王雅宜楞伽小隱圖卷

陳白陽墨花卷

張元春安氏西林圖冊

周公瑕墨蘭卷

明賢合寫藥草山房圖卷

項子京雙樹樓圖軸

徐天池墨花卷

董文敏書畫冊

董香光書畫袖珍冊

董香光山水九幀冊



董文敏贈何宗伯詩書畫軸

董香光嵐容川色軸

李泡盦谿山秋意圖卷

李長蘅書畫冊

楊吉州贈無功山水卷

楊龍友山水軸

邵僧彌小可觀冊

張爾唯詩畫卷

程孟陽臨宋人山水卷

程松圓山水十景冊

卞潤甫壽煙客冊

吳梅村山水軸

吳祭酒南湖春雨圖軸

陳老蓮鍾馗象軸

陳章侯胡華鬘合冊

陳小蓮山水人物冊

八大山人二十二幅冊

石谿達磨面壁圖卷

陳涉江浮海圖卷

清湘老人花果冊



清湘老人黃牡丹圖軸

藥地師書畫禪冊

丁南羽山水冊

魏子一仿宋元八家冊

姜學在高山流水軸

垢道人望裏氤氲圖軸

垢道人秋巖聳翠圖卷

顧子怡墨蘭卷

龔野遺山水十二幅冊

王孟津書畫合璧卷

黃孝子萬里尋親圖冊

傅青主書畫卷

楊龍友王烟客惲道生張爾唯四家山水合卷

卷之六

惲南田靈巖山圖卷

甌香館寫生冊

南田墨妙冊

惲南田蒲塘真趣圖軸

南田仿叔明夏山圖軸

南田摹癡翁富春大嶺圖軸



惲南田設色蟠桃圖軸

墨井道人橫山晴靄圖卷

吳漁山贈許青嶼墨井草堂消夏圖卷

墨井道人山水冊

吳漁山柳村秋思圖軸

吳漁山湖山春曉圖軸

吳漁山贈湘碧山水軸

吳墨井秦吉了軸

王烟客仿古山水冊

西廬老人爲子顓菴仿古冊

王西廬答菊軸

王烟客仿黃子久秋山曉霽圖軸

王烟客仙山樓閣圖軸

西廬先生年譜附

王圓照仿宋元山水十幀冊

圓照仿宋元八家冊

王圓照寫夢境圖軸

王圓照仿趙文敏九夏松風圖軸

王圓照仿子久浮嵐暖翠圖軸

王麓臺湖湘山水圖卷

王麓臺爲趙松一仿子久山水卷



王麓臺仿宋元山水十幅冊

王麓臺高岫晴烟圖軸

王麓臺倣黃鶴山樵松溪仙館圖軸

王耕烟黃鶴傳鐙圖卷

王耕烟寫吳元朗西齋圖卷

耕烟江山無盡圖卷

王石谷臨黃大癡富春山圖卷

王石谷水竹幽居圖卷

王石谷十萬圖冊

王耕烟爲東海司寇摹古山水冊

惲題王石谷山水十二幅冊

王石谷臨董北苑萬壑松風圖軸

王耕烟仿叔明山館午參圖軸

王石谷臨江貫道谿山無盡圖軸

王石谷仿黃鶴山樵寫山莊樂志圖軸

耕烟散人臨雲林畫軸



過雲樓書畫記卷第一

元和顧氏

書類一

釋智永真草千文卷

余曩讀吳泰硯廬帖載香光跋東坡書曰余有永師千文自龍師起後有薛紹彭印往來於心者舊矣同治庚午候簡入都暇輒過松筠菴與僧心泉談謂曰欲見墨林瓊寶乎則永師千文也真草相間凡百六十行行十二字果龍師起且有香光長跋確爲是卷狂喜傾囊購歸跋稱王敬美家有薛紹彭與趙大年書云欲易智永書須以他畫按薛書刻入戲鴻堂帖又稱米元章書

曰見大年千文愛其有傾側之勢出二王外米書則見  
停雲館帖又稱今此千文有紹彭藏印惟本大年得之  
紹彭誤書爲紹彭得之大年耳又稱余得之吾鄉宋光  
祿頃馮宮諭發歎不已因歸之容臺集題跋亦云余昔  
於宋光祿見永師千文後有押字薛紹彭收藏印及書  
乃令穰以王維雪山易智永千文語也王晉卿愛子瞻  
仇池石易以韓幹二散馬紹彭大年將毋同宋世士大  
夫雅尙如此可述也思翁以歸伯衡當非脫手贈惜未  
明言何物遙續韻事耳旋復爲太原溫啟封得有郭尙  
先李宗瀚二跋可證今存卷尾最後歸余取冠過雲樓



集帖第前闕百八十字所謂律召調陽者無從考見然  
已曠世殊珍矣夙昔往復余心者忽據爲余有文字之  
福未渠央也儻亦永公牖余乎公名法極右軍六代孫  
年至百歲見陸友仁硯北雜志引會稽志紹彭字道祖  
號翠微居士居長安符祐間以書名名並米芾見郁逢  
慶續書畫題跋記李東陽引書史會要因附記之

米題褚摹蘭亭卷

褚登善手撫蘭亭廿八行用硬黃紙本押尾鈐紹興小  
璽後有米元章跋云右米姓秘玩天下法書第一又云  
此軸在蘇氏命爲褚摹觀意易改誤數字真是褚筆蓋

卽蘇才翁三卷之一也題後有熠熠客星豈晉所得六  
十五字贊並署元祐戊辰獲此書崇甯壬午六月大江  
濟川亭舟對紫金避暑手裝與寶晉英光集小有異同  
及觀輟耕錄蘭亭集刻辛集有循王家藏本米芾跋云  
壬午閏六月九日大江濟川亭艤寶晉齋艤對紫金浮  
玉羣山迎快風消暑重裝乃知書史爲後人掇集故因  
彼而誤可據手迹正之以後別紙書政和六年夏汝南  
裝及李時勉高穀苗衷吳餘慶王英胡澹徐有貞陳鑑  
八家跋皆與吳子敏大觀錄合特錄於汝南裝後失記  
萬厯庚申歲元旦合虛山人沈延賞觀耳據陳鑑跋云



蘇令家蘭亭三本余得見其二焉一在友人劉廷美僉  
憲家上有蘇易簡題有荅象夫子尙興闕里門數語并  
宋諸公題識此其第一本卽都穆鐵網珊瑚所謂宜興  
尹氏臧褚摹稷帖蘇易簡題有荅象夫子一首後范文  
正蔡君謨裴煜馮當世跋富鄭公梅都官呂汲公蘇氏  
兄弟米海岳諸公題名小米鑒定者也顧又云此卷後  
歸陳祭酒緝熙觀鑑跋云在劉廷美家可知其誤跋又  
云此則其第二本也題爲唐褚遂良摹其書豪髮備盡  
與真無異南宮酷愛之謂世傳眾本皆不及長字其中  
二筆相近末後捺筆鉤迴筆鋒直至起處懷字內折筆

抹筆皆轉側偏而見鋒慙字內斤字足字轉筆賊毫隨  
之於斫筆處賊毫直出其中世之模本未嘗有也卽書  
史所載蘇耆家蘭亭三本第二本在蘇舜元房豪髮備  
盡少長字世傳眾本皆不及也云云始知禊帖偏旁考  
阿章早開其例且帖後米題但云元祐戊辰獲此書而  
書史云蘇治才翁子也與余友善以王維雪蕉李主翎  
毛徐熙梨花易之當時兩家互易於此考得爲之一快  
最後曹師稷跋有口文思贊語合卷中沈思贊父印觀  
之豈沈延賞之字耶是帖自宋迄今流傳有緒神品何  
疑乃文休承有陳翰林雙鉤之說後之覽者勿沿其譌



米題唐模蘭亭卷

往余得是帖以示老友吳平齋姻家據式古堂書考所載褚模蘭亭有紹興小璽及秋壑彝齋諸印與此一一吻合因疑范文正王堯臣數十家題跋爲鬻古者割去別裝僞帖給人漁利初亦謂然及細檢之卞本本幅有內府書印機暇珍賞睿思東閣印而此本接縫處爲睿思殿印機暇清賞內殿秘藏寶玩印一異也卞本米題後有楚國米芾滕中印而此本爲楚國米芾崇文內史印二異也乃知卞令之所藏非卽此本就此本帖後米詩彥遠記模不記褚要錄班班紀姓氏後生有得苦求

奇尋購褚模驚一世則帖非褚模明甚故桑世昌蘭亭  
考俞松續考並載此帖與詩題爲永徽中模本不言褚  
模以寶晉英光集復有跋褚臨蘭亭帖云是本朝丞相  
王文惠公故物乃黃絹幅也此本氣韻生動筆法精嚴  
當如桑俞所考定爲永徽中所模王惕甫署檢作米元  
章題唐模蘭亭洵是通論至卞本當卽刻入三希堂  
石渠寶笈法帖者觀帖後尙存米詩及范文正王堯臣  
劉涇張澤之四家題識可證要之有米詩在後亦唐模  
矣

唐寫鬱單越經卷



右唐經生寫經首云佛告比丘鬱單越天下多有諸山  
末云鬱單越秦言最上余按鬱單越三字見大方廣佛  
華嚴經及大乘頂王經又大涅槃經作鬱單越國及北  
鬱單越雜阿毘曇心論作鬱單曰起世因本經作鬱多  
羅究留部異執論作鬱多羅鳩婁檢各家音義多應謂  
當作鬱怛羅究瑠慧苑謂當作殓怛羅句噓慧琳謂當  
作唄怛羅矩嚕鬱單越與鬱怛羅殓怛羅唄怛羅對音  
究留與鳩婁究瑠句噓矩嚕對音卽大般若波羅蜜多  
經之北俱盧洲大乘理趣六波羅蜜多經之北拘盧洲  
也洲在妙高山北大海之中其形正方定壽千歲無中

天者常受快樂勝餘三洲最爲高上故名鬱單越鬱單  
越文與鬱多羅對音梵語常著衣中最在上者亦名鬱  
多羅故四分律有鬱多羅僧阿毗達磨俱舍論有囄多  
羅僧據知鬱單越爲最上之名此經後世希見故未入  
大藏幸唐經生以如來所說發大願力精寫之遂成銘  
心絕品中觀論云如說有地獄有天有鬱單越無有見  
者信聖人語故知其有寫經者信受淨業亦當如是觀  
唐寫續花嚴經疏卷

唐寫續花嚴經疏殘本據文當是釋十迴向品以至阿  
祇僧品余從同郡金君芷衫得之金君游日本從佛眼



山僧澈定得之澈定謂是唐本引弘法大師請來目錄  
載新譯花嚴經及花嚴疏又性靈集大師在唐之時請  
越州節度使廣求內外典籍爲證金君又引倭漢三才  
圖會云大師讚州多度郡屏風浦佐伯直田公之男也  
母夢梵僧入懷妊十二月寶龜五年生幼通六經史傳  
從石淵寺勤操受聞持法博涉三藏佛經十九歲薙染  
二十歲落髮二十二歲於東大寺受具足戒號空海三  
十一歲爲求法乘遣唐使船入唐明年謁德宗皇帝觀  
惠果和尚惠果曰來何晚乎留學三年三十三歲歸朝  
承和二年入定年六十二敕贈弘法大師考倭漢年契

寶龜五年乃唐大厯九年至三十一歲入唐爲貞元二十年又澈定新撰譯場列位新花嚴般若本貞元十一年譯十四年畢進上雖未審疏作於何時當在二十年之前觀弘法請來目錄已有新花嚴并疏可知余按據金君與澈定考定續花嚴經疏唐時由中國請至日本今仍由日本還諸中國使中國今日得見唐時卷子本制度善一旦知唐時釋部亦是單疏本與經別行善二又唐時釋澄觀花嚴經疏鈔會本二百二十卷尙存大藏今得經生寫本足以校其同異善三而書法之圓勁古厚足爲右軍大令血肩猶不與焉然則是疏爲我中



國之瓌寶淪入日本千餘年矣一旦來歸歡喜無量詎能以殘本少之哉

唐寫三彌底部論卷

三彌底部論隨眾經目錄入單本品云四卷或三卷今大藏小乘論所收卽或本也是卷硬黃精楷向爲覃谿舊藏卽程風衣贈王良常者良常跋云自當爲鍾可大故虛舟題跋直稱唐鍾紹京書三彌底部論上卷而竹雲定本跋靈飛經又有得唐經生書三彌底部論於淮陰與此經無異之語當是定論卷後接裝李龍眠白描羅漢十六尊亦與虛舟題跋合余以不真去之而刻此

入過雲樓集帖云

范文正手札卷

吾吳文正書院藏公眞蹟有黃素書伯夷頌及尺牘兩  
通自北宋至我朝范氏子孫世守勿替聞庚申後頌  
始失去尺牘亦歸余家一但云仲淹再拜一云仲淹拜  
聞中舍三哥其下皆商度義田事蓋以答族子者余按  
皇宋書錄引山谷云往時蘇才翁於書少所許可獨許  
公書得樂毅論筆意南軒云借使字畫不工猶當寶藏  
況清勁有法度如此哉然則論公手札已足千古矧其  
所言有敬宗收族之精意爲百世下所奉法乎宜沈周



胡纘宗皆以世澤二字署首也卷後題跋都二十四家  
吳寬王鏊沈周費宗喬字胡纘宗湛若水鄒守益張時  
徹張邦奇高第歐陽鐸沈一貫明史皆有傳柴奇字德  
美崑山人正德辛未進士歷順天府尹廖梯字雲卿興  
化人正德丁丑進士歷知府周倫字伯明崑山人歷尙  
書諡康僖劉希龍字仁甫安丘人正德甲戌進士歷尙  
書張琮字廷憲江甯人宏治庚戌進士累官至南京都  
察院右都御史錢琦字公良海鹽人正德三年進士林  
文俊字汝英莆田人正德辛未進士歷禮部侍郎諡文  
修均見凌迪知萬姓統譜惟王冀龔守愚陳寰鄭三德

無考余喜公翰長許下諸帖外復見此書且浸朮辟瘟  
等語與明張袞水南翰記范文正公所居宅必先浚井  
納青朮數斤於其中以辟瘟氣相合足爲養生要訣懷  
英藉仁眈敬輿集方壽世先生其人矣因刻入過雲  
樓集帖以諗來者

蘇文忠祭黃幾道文卷

長公此文結銜稱翰林學士朝奉郎知制誥蘇軾朝奉  
郎中書舍人蘇轍故式古堂書考題東坡兄弟祭黃幾  
道文文後并載宏治辛酉華亭錢福跋而卷中無是蓋  
萬厯間歸王鳳洲後去之見弇州山人續稿六大家十



二帖跋中然考續稿又有摹蘇長公真蹟跋云客有周  
□□徐長孺章仲玉及吾從子駟素善公結法因令各  
響搗大小彙爲七帙藏之山房內有祭黃幾道文云云  
知此文鳳州有響搗本卞氏在國初時復載錢跋得非  
跋爲飛鳧家所得乃取響搗本合之耶文見公集中又  
袁桷清容居士集有跋蘇文忠與黃師是尺牘云黃師  
是實先浦城人其父潁州府君好謙與二蘇公爲同年  
進士師是遂與蘇公家通姻譜與祭文稱潁州使君同  
年及納幣請婚義均股肱語合施注蘇詩送黃師是赴  
兩浙憲云黃師是名實神宗時登進士第歷京東河北

轉運師是爲章子厚之甥子由官陳由是二女皆爲子  
由婦是也好謙字幾道蓋取易傳人道惡盈而好謙之  
義知幾道卽好謙無疑書此補董華亭笪江上王橫雲  
諸跋遺扁

蘇文忠與謝民師札卷

漫叟詩話云謝舉廉字民師余建中靖國中與同寓興  
國寺詩律尤古見苕溪漁隱叢話東坡與民師書問往  
還自北歸時始本集有與謝民師二首是也此札在旣  
歸之後據集本與謝民師推官書中有自還海北見平  
生親舊惻然如隔世人云云卽其左證惜札中此數語



明時已佚俗儻乃割裂卷末然軾方過臨江之軾字用  
爲首句又取疑若不文是大不然二語合上殘字綴集  
作是文之意疑若不然復以然下旣去軾字無從補空  
乃竄則字入之紫鳳顛倒蒼狗變幻將謂世無范雲不  
能讀會稽刻石耶烏知全集具在不患無緣補脫字也  
今首幅所缺百五十三字婁子柔補書於後凡十四行  
并爲之跋又有陳眉公董思翁馮伯衡三跋初爲繆文  
子收藏後歸齊梅麓徐紫珊嘗借摹上石最後爲吾吳  
程心柏所得迺以售余近刻過雲樓集帖復與祭黃幾  
道文並壽於世

黃文節梵志詩卷

苕溪漁隱引山谷云王梵志詩云梵志翻著襪人皆道是錯乍可刺伊眼不可隱我腳又云城外土饅頭餽草在城裏一人喫一箇莫嫌沒滋味知山谷喜其茗柯有理故又手寫是卷惟卷中兀然無一字句寫時斂去一字董思翁筴在辛梁退菴三跋旣未拈出高江村陸潤之兩錄亦未及言余觀朱性父鐵網珊瑚亦著錄王孟德家大書長卷而惟存兀然無事坐春來草自生十字又知山谷書梵志詩不止是卷故所斂一字非惟人不覺卽問諸山谷恐亦熟於篇終二語亦不自覺也梵



志者隋文帝時衛州黎陽城東十五里王德祖家有林檎生癭如斗三年朽爛剖皮見一孩兒遂收養之因名林木梵天後改梵志作詩甚有義旨見大平廣記引史遺云

朱文公周易繫辭本義手稿卷

壬午二月四日余姻吳愉庭取假年學易之義持贈此卷爲兒子承壽稿用烏絲闌大小字分經注書自小疵也起至當期之日止都六十行中間生生之謂易下接聖人有以見天下之蹟脫經文百六十二字驗其折縫當是失去一紙至每分章節處皆作墨圈於首又遇慎

字缺筆閒有塗改竄易以今本本義第七卷校勘詳略  
各殊其意同而辭異者不悉舉就正德元年八月朔日  
李東陽跋言之如游魂爲變注曰魂旣游則魄降而爲  
變定本乃曰魂游魄降散而爲變李云蓋其初說似微  
有次第之可議定說則見魂魄相離無分先後之義方  
爲精當五位相得而各有合注曰一與六相得合而爲  
水二與七合而爲火定本乃曰一與二與三與四各以奇  
耦爲類而自相得一與六二與七皆兩相合李云語錄  
亦曰相得如兄弟取奇耦之相爲次第有合如夫婦取  
奇耦之相爲生成又曰甲乙木丙丁火相得甲與巳乙



與庚相合蓋初說止一義定說則於經文而字各字皆有著落而義益完足先生嘗自謂字字從分金等子上稱來今觀命意造語累易而後定然後知其用心之密云云推崇考亭可謂極至亦烏絲精楷書卷首又篆文公手澤四字清雄茂挺洵稱傑構在抱壘室日何煖叟同年嘗爲跋尾果如所言華亭張氏臧有謙隨二卦手稿倘亂後尙未燬失文字有靈吾與承他日其庶幾遇之

朱晦翁上時宰二手札

按宋紀孝宗淳熙五年十一月以趙雄爲右丞相雄以

朱某累召不出請出外郡命知南康軍語並見雄本傳  
又按朱子年譜淳熙五年八月差知南康軍辭十月有  
旨不許辭免復辭十二月省劄趣之任六年三月省劄  
復趣行是月晦趣上至五月中請祠不報六月奏乞減  
星子縣稅錢又請祠不報明年正月又請祠不報二月  
復奏乞免星子縣稅錢云云則此卷前一劄所云具稟  
減稅請祠二事正在史浩罷相後王淮未相前當是上  
趙雄之書乃四明陳氏敬宗謂二劄皆上王淮吉水廖  
氏莊又謂前劄恐上史浩以余觀之二說均誤惟後一  
劄固懲婺豪民洵上王淮無疑卷於康熙初爲蓋牟卞



氏所藏載書考中紙尾銜接處有式古堂印可據後刻入慈溪董氏帖中公以道德重建樹且公餘事況書乎然瑣羽零豪具見麟鳳惟得之較晚未爲集帖光耳因書李賓之跋後彼時宰嫉賢氣燄安在

魏文靖文向帖卷

按帖凡四十九行行間點竄塗改及雙行夾註往往而有因首有文向二字遂援淳化閣帖例名爲文向帖帖中前半言李全事有云山東近來郎當忒甚隴西專恣不復更有制司所謂制置者素爲所狎舊呼隴西爲乾爺今一切以次子畜之頤指氣使惟其命是聽聚兵蓄

船意鄉叵測正所謂削亦反不削亦反反速禍小反遲  
禍大也卽宋史叛臣傳史彌遠授徐晞稷淮東制置使  
令屈意撫全其後至以恩府稱全恩堂稱楊氏而手足  
倒置也又旁注云朝廷只用一彭義斌制之義斌今爲  
兵所敗而死又有一時青總管可恃近亦隸其節制卽  
傳所云義斌與大元兵戰於內黃之五馬山死之全使  
人說時青附已餽金五百兩青見義斌死乃附全也後  
半乃訟濟王竑冤事有云洪舜俞乃能如此胡評事夢  
昱尤不易又云丁文伯甚卷卷門下此間可與論心者  
自張行甫忠恕去後僅有此人耳卽宗室傳彌遠令客



秦天錫詣竑諭旨逼竑縊於州治於是在廷之臣真德秀魏了翁洪咨夔胡夢昱等每以竑爲言了翁傳亦云屬濟王黜削以死有司顧望治葬弗虔朝士惟了翁與洪咨夔胡夢昱張忠恕所言能引義刷上最爲切至也又云富公溫公辭樞府不拜在先朝往往有之今了翁忽辭工侍舉朝便已驚怪卽本傳俄權尙書工部侍郎了翁力以疾辭也特所稱提刑提舉郎中尊眷丈不繫名氏莫詳誰某墨緣彙觀載魏了翁帖亦稱提刑提舉親家尊眷丈未知卽其人否帖後有元賢十二跋牟應龍趙孟頫劉岳申元史有傳龔璘字子敬高郵人白珽

字廷玉錢塘人見宋學士集白公墓銘顧文琛有馮侯  
去思頌見元文類劉致字時中河東人見書史會要陳  
復述律鐸爾直陳潤祖上官伯圭皆無可考據牟跋是  
帖爲文靖子孫元裕物匏翁家藏集題魏元裕遺墨云  
元裕自稱玄孫殆起之子是也舊爲太倉王顥菴相國  
所藏今歸兩壘軒子貞信臣平齋皆有題跋承兒心愛  
是卷以漢銅官私印四十紐易得之

張溫夫楷書金剛般若波羅蜜經冊

皇宋書錄張卽之字溫夫安國之後甚能傳其家學及  
考甫田集題跋乃參政孝伯之子則安國兄子耳其字



極書之變家藏集跋不完杜詩已言之此梵夾本金剛  
般若波羅蜜經三十二分烏絲闌書每半葉四行行十  
字末云張卽之伏爲五月十三日顯嬪恭人楊氏一娘  
遠忌以天台教僧宗印所校本寫此經莊嚴淨報淳祐  
八年歲次戊申仲夏望日謹題卽之時年六十三以視  
郁逢慶書畫題跋記寶祐元年七月十八日卽之年六  
十八歲寫經前六年六研齋二筆景定四年歲次癸亥  
卽之七十八歲寫經前十六年而先後皆用天台教僧  
宗印所校本按趙宗印關中奇士靖康建炎間提義兵  
出戰會王師敗於富平知事不濟大慟於王景略廟披

髮入華山不知所終見盛如梓庶齋老學叢談此經爲  
其校定具不可思議功德故後幅元釋子及明賢題跋  
多所推挹跋中天童雲外靈巖從定瑞光文中無考餘  
如行端字景元一字元叟俗姓何氏清欲號了菴別號  
南堂遺老皆臨海人來復字見新豐城人姓黃氏有蒲  
菴澹游二集謝矩字元規鄞人有鳴窮集見 欽定明  
詩選姓氏爵里中元熙祖瑛附見釋如惺明高僧傳有  
云紹興寶林寺大同出錢塘見晦機熙禪師晦機深嘉  
其志蘇州嘉定淨信寺祖備祝髮後東游四明時石室  
瑛公居育王山待以忘年則元熙字晦機祖瑛字石室



也復見心跋在洪武乙卯謝元規在建文壬午中間尙有三行減去文字無從辨識意是靖難諸臣墨迹革除之際易觸文網緇流懼禍而去之

張溫夫書華嚴經冊

張祕閣書得力於金錯刀由能品入神品千人皆見之技也此寫大方廣佛華嚴經第三十八卷張叔未跋稱其瘦削飛動體近鍾可大實則參用柳誠懸筆意耳此種天地間有數名蹟雖暗中摸索能自得之必取證於款識毋乃笨伯跋稱泉唐胡秋白得諸潮鳴寺原是六本裝成後以其半歸寺僧其一以與伯氏其一爲陳曼

生取去孤存此本蓋嘉慶甲子秋白偕查梅史屠琴隲  
范小湖父積堂讀書寺中時也嘗攷頻羅菴集山舟學  
士於樗寮流傳墨妙前後凡四跋最後卽爲潮鳴寺僧  
跋樗寮所書華嚴經第三十六卷亦稱爲祕閣真蹟無  
異辭益信先施毛嫵不俟問名而知之也且言雖僅八  
十卷之一而閱世六七百年紙墨如新不可多得按彙  
刻書目釋藏部華嚴類載大方廣佛華嚴經一係六十  
卷一係八十卷則隋書經籍志但云三萬六千偈不繫  
卷數者未免失諸太疏學士輒能記其卷表知其深於  
內典宜洪更生以雲山梵唄發人深省品題其詩矣余



於祕閣八法嗜之甚深所得可雀然不疑者惟此著錄  
二種憶曩在都門偶過許星叔庚身齋中見有祕閣手  
書華嚴經一卷因座有他客草草繙帙一終不記爲何  
卷至今惜之余跼伏里門而星叔遊宦京華雲龍之合  
視韓孟爲難互出夸炫不知又在何時也

